

SCRIPT OF MORNING GOJRI NEWS BULLETIN 3OCT 1015 HRS

مارننگ گو جری نیوز بلیٹن مو رخہ 3 اکتوبر 2025

یوہ آکا شوانی جموں ہے محبوب سلطانی تیں خبر سُنو۔

LG BAPU JI

لیفٹیننٹ گورنر منوج سنہا نے پچھلے تہاڑے سرینگر مانہ مہاتما گاندھی نانہہ اُن گا جنم تہاڑا ور خراج عقیدت پیش کرتا مانہہ کیو جے باپو گا خواب نانہہ وزیر اعظم نریندر مودی کی قیادت اندر اصل شکل دتی جارہی ہے جناب منوج سنہا نے کہیو جے گاندھی جی گا اصول یعنی بے لوٹ خدمت تے فرائض نانہہ پورو کرنو ہم نانہہ وکست بھارت گا تعمیر گا سفر مانہہ رہنمائی فراہم کرے غو۔ انہاں نے مزید کہیو جے معاشی خوشحالی گے نال ہم اک ایسا معاشری غی تعمیر واسطے پر عزم ہے جہیڑو اخلاقی قوت توں مضبوط تے برابری تے انصاف ور مبنی وے۔

DY CM BRIDGES

نائب وزیر اعلیٰ نے نوشہرہ علاقہ مانہہ سڑک رابطہ نانہہ بہتر بنان واسطے تراہم پلاں گو نی پتھر رکھیو ہے جن مانہہ 50 میٹر لمبو پُل آندوت نالہ ور 292 لکھ غ لاگت سنگ بنایو جے گو۔ جد کہ رتن کالا کلسیاں مانہہ 284 لکھ غی لاگت نال بنایو جارہیو 28 میٹر پُل تے آندروت نالہ ور 50 میٹر گو اک ہور پُل وی شامل ہے جس ور کل 4 سو لکھ روپیہ خرچ کیا جیے غا۔ اس ضمن مانہہ لوکاں نے نائب وزیر اعلیٰ گو شکریو ادا کیو اپنا دورہ غے دوران جناب سریندر چودھری نے کلسیاں مانہہ اک عوامی دربار وی منعقد کیو جت انہاں نے لوکاں گا مسلاں نانہہ سنیو تیں کئی شکایتاں گا موقع سر حل وی کیو۔

RANA TRIBAL FESTIVAL

قبائلی امور گا وزیر جاوید احمد رانا نے پچھلے تہاڑے پونچھ کی مینڈر تحصیل گا ساگرہ علاقہ مانہہ قبائلی میلہ مانہہ شرکت کی جس مانہہ قبائلی برادری گا امیر ثقافتی ورثہ نانہہ دسیو جارہیو تھو اس موقع ور خطاب کرتا مانہہ انہاں نے زور پایو جے ترقی نانہہ ثقافتی روایت گو احترام کرنو چاہیے تانجے پیر پنجال کی قبائلی برادری کی نشان محفوظ رکھے انہاں نے اس گل نانہہ دہراتا مانہہ کہیو جے عمر عبدالله کی قیادت آلی جموں کشمیر حکومت شمولیتی تے باعزت قبائلی ترقی واسطے پُر عزم ہے جہیڑی قبائلی ورثہ گا احترام تے اس گا فروغ نانہہ یقینی بناوے گی اس میلہ مانہہ قبائلی ورثہ گو روایتی کھانو دوائی بنان آلی جڑی بوٹی تے دیگر قبائلی چیزاں نانہہ وی دسیو گیو۔

SEVA PARV

سیوا پرو جموں صوبہ مانہہ پیر جوش تقریب تے لوکاں کی خاصی تعداد مانہہ شمولیت سنگ ختم ہو گیو لہے دو ہفتہ لمبی اس مہم گے دوران صفائی ماحولیاتی تحفظ تے سماجی ذمے داری ور توجہ مرکوز کی گئی اس سلسلہ غے تحت بسولی مانہہ اٹل سیٹو ور برا پیمانہ ور صفائی مہم مانہہ حکام تے مقامی لوکاں نے جوش و خروش

سنگ شرکت کی اونگا ڈوڈہ مانہ صفائی کرن آلا نانہ عزاز توں نوازیو گیو جد کہ گرایاں مانہ بوتلاں گی مہم وی چلائی گئی ادھمپور مانہ تپ دق گا مریضیاں نانہ کھان گی چیزاں گی کٹ دین تیں علاوہ ٹی بی بارے بیداری مہم وی چلائی گئی اس ضمن مانہ حکام نے شہریاں ور زور پاتا مانہ کیو جے وے صاف ستھری عادت اپنوی پسماندہ طبقاں گی مدد کرے تے گاندھی اقداد خدمت تے صفائی گا اصولاں نانہ اجتماعی تے لگاتار کوششاں سنگ فروغ دے۔

SMVD RESTORATION DRIVE

لیفٹیننٹ گورنر منوج سنہا جہڑا شری ماتا ویشنو دیوی شرائین بورڈگا چئیرمین وی ہیں گی ہدایت ور ہالیہ بارشاں تے پسی پین توں متاثر ہون آلا ریاسی گا سکولاں گی بحالی تے مرمت گی مہم شروع کی گئی ہے بورڈگے طرفوں سماجی مدد گی اس پہل گو مقصد سکول گا بنیادی ٹانچاں نانہ تاولے بحال کرنو ہے تانجے طالب علماں گی تعلیم مانہ رکاوٹ نانہ آوے ان بھالی گا کماں نانہ ترجیح فیٹا مانہ بورڈ نے خطہ مانہ تعلیم تے سماجی فلاح تے بہبود گی حمایت گا عزم نانہ آجاگر کیو ہے۔

DUSSHERA

پورا جموں خطہ مانہ دسہرہ گو تہوار بڑا جوش و خروش تے مزہبی عقیدت سنگ منایو گیو ہے اس ضمن مانہ بکھ بکھ جگہاں ور راون میگھ ناتھ تے کمبھ کرن گا پتلا نانہ اگ گے حوالے کیو گیو جس نانہ دیکھن واسطے عقیدت منداں نے بڑی تعداد مانہ شرکت کی۔ اس ضمن مانہ ثقافتی پروگرام رام لیلا گی اداکاری تے جلوساں نے اس تہوار گی رونق مانہ خاصو بادھو کیو اس ضمن مانہ مقامی حکام نے اس تہوار نانہ بہتر طور منعقد کرن واسطے حفاظتی تے ٹریفک گا نظام نانہ وی یقینی بنایو یہ تقریب اک جٹ ت روایت گی عکاسی کر رہی تھی کیونجے سماج اگ بکھ بکھ شعباں توں تعلا رکھن آلا لوک بدی ور نیکی گی علامتی جیت نانہ دیکھن واسطے اکٹھا ہویا تھا۔

WEATHER

بھارتی محکمہ موسمایت نے موسم بارے جانکاری دیتا مانہ خبردار کیو ہے جے 4 توں 7 اکتوبر توڑی اک مضبوط مغربی ہوا گو سلسلو جموں کشمیر نانہ متاثر کرے غو اس دوران وادی گا کُجھ علاقاں مانہ لوہکی توں درمیانہ بارش جد کہ اُچیراں علاقاں مانہ برف باری ہوسکے اونگا پہلگام گلمرگ سونا مرگ مانہ برف باری ہون بارے وی دسیو گیو ہے جد کہ جموں گا کُجھ علاقاں مانہ بجلی کڑکن تیز ہوا چلن تے بارشاں بارے وی دسیو گیو ہے حکام نے اس بارے وی دسیو ہے جے اہم شاہراں ور آؤ جائی متاچر ہوسکے جد کہ پہاڑی علاقاں مانہ پسی پین تے پتھر آن گو خطرو بدھ سکے۔
